

欽定剿平粵匪方略

欽定勦平粵匪方略卷二百四十八 庚申年

七月二十二日

甲寅

龐鍾璐奏言自七月以來江

陰賊匪連日出撲向東焚掠臣令都司王元昌

堵守長壽團長梁國泰堵守長蘆又另選團勇

堵守章卿等鎮詎賊衆由踞龍山抄入大股直

撲江陰之楊庫城一時救援不及楊庫城遂於

七月初五日不守各鎮之勇俱已衝散賊復向

東焚掠臣督飭知縣周沐潤王慶元等激勵民團臣親督都司許玉珍率領常熟西路民團竭力堵禦賊勢稍卻又竄至西南一帶焚掠卽調民團堵截然賊衆勇單有不能支持之勢王元昌梁國泰等在楊庫之西俱已隔絕無從檄調查楊庫城爲江陰常熟交界要地又爲斜橋海口要道其地與常熟西鄉一帶處處通連皆係

平陽坦道今楊庫城已被賊踞賊衆向東焚掠
離常熟縣城不過二三十里縣城環山外高於
內極爲單薄又無守兵居民遷徙已空况困守
三月糧餉已罄又無從乞援危在呼吸臣兩月
已來晝夜不寐病體難支現惟有竭力激勵民
團督率向西堵禦一面飭編修趙曾向至江北
與各紳士速集民勇前來救援援師早集方有

轉機又自七月初二日以後上海道路隔絕臣
與薛煥信息不通據探自初二日未刻賊匪竄
擁圍城城外民房均已焚燬城門緊閉聞信之
下焦急萬分查上海爲餉源所繫常熟爲江北
外蔽設有疏虞大局何堪設想伏乞

皇上迅飭浙江諸軍速援上海江北諸軍速援常熟並
催曾國藩迅速統師南下以遏狂氛奏入

上命軍機大臣傳諭龐鍾璐曰江北防兵本不甚多近因馮子材帶兵由丹陽進援金壇李若珠撥兵二千名助剿嗣薛煥因上海危迫又調去勇五百名並長龍船全行赴滬水陸各軍無可再撥勢未能兼顧常熟仍著龐鍾璐剴切曉諭紳民團勇竭力防剿一面督同知縣周沐潤等力籌保衛一面催令編修趙曾向速檄江北民勇前來救援至上海被圍甚急前諭

瑞昌等迅撥精銳四五千名馳往應援諒已趕到仍
著龐鍾璐隨時偵探俟上海圍解即可會同薛煥將
各路援兵分顧常熟以杜賊氛

同日李若珠奏言接署兩江督臣薛煥函稱逆
匪自復陷松江後卽大股攻竄上海縣城三面
被圍萬分危急請飭總兵曾秉忠統帶全幫船
隻及都司姜德原部勇壯飛速來滬速解城圍

臣思上海爲江南餉源所自出鎮城全軍一萬
數千人口糧賴以接濟且與北岸唇齒相關臣
日夜焦思未敢漠視卽令都司姜德帶勇五百
名駕船馳往並咨派曾秉忠管駕全幫長龍等
船卽由長江順流赴滬以期迅解城圍力顧餉
源保全北岸惟曾秉忠長龍船隻原係派往江
陰靖江福山狼山一帶爲上下游策應之軍現

在全幫調往上海長江更覺空虛賊人造船之
說各處傳聞乘虛而入是其慣技務須多派艇
師節節防備臣兩次奏調上游吳全美李德麟
師船恭奉

上諭傳知已逾兩月迄今該船仍未東下遲遲之故實
難懸揣刻下江南防勦迫不及待相應請

旨再飭楊載福迅派吳全美李德麟等管帶全隊師船

疏通江路不分晝夜剋期下駛俾南北得以兼顧方爲周密奏入

上命軍機大臣傳諭楊載福曰據李若珠奏逆匪自復陷松郡大股竄至上海該縣三面被圍情形萬分危急業經派令都司姜德管帶練勇五百名駕船前往並派曾秉忠管駕長龍等船順流赴滬現在長江下游務須多派艇師節節防備請飭楊載福迅催上游

師船剋期下駛兼顧南北等語上海爲江南餉源所
自出且與北岸唇齒相關儻有疏虞關係甚重曾秉
忠一軍駐紮江陰靖江一帶原爲策應上下游而設
現已全幫調赴上海則長江更覺空虛現聞逆匪有
在蘇造船之說萬一乘虛而入勦辦愈難得手前有
旨令吳全美李德麟等統帶全部師船駛往下游聽
候調遣迄今未見東下殊屬延緩著楊載福查明該

總兵等師船是否江路梗阻仰係沿途逗留迅飭不分晝夜駛赴下游聽候調遣毋得再涉遲延致有貽誤

二十三日

乙卯

曾國藩奏言 臣奉

諭旨飭催左宗棠等到齊分路進兵規復蘇常一節查左宗棠之勇選練未齊聞須八月朔日始由湖南起程李元度擬於七月初帶勇由平江起程

尙未報行抵何處鮑超因江水封峽不能行舟
六月十六日始由夔州起程張運蘭六月二十
七日行抵萍鄉適江西撫臣毓科以南贛有警
札飭該軍暫紮袁州尙未接臣後二次飛催來
皖之札屈指約計李元度張運蘭鮑超等到徽
當在七八月間左宗棠到徽當在九月中旬臣
前奏由池州廣德進兵維時廣德有江長貴扼

守我軍由此進攻冀與嘉湖各軍聯絡頃接張
芾函稱竄杭之賊由安吉孝豐回撲廣德該州
城竟於七月初四日失陷江長貴不知下落賊
必踞此要地使皖浙之師聲氣隔絕又甯國被
圍一月雖經周天受督兵固守而賊仍未退據
探僞譜王楊七麻子帶池州之賊將自北路往
撲甯國新破廣德之賊將自南路往撲甯國甯

郡糧少援孤竊恐周天受力難久支軍情變幻
旦夕不同鮑超不能於六月趕到皖境旣與臣
原奏不符江長貴不能一日堅守廣德尤非臣
意料所及目下皖南固危乎其危浙江亦防不
勝防臣軍調齊以後須一攻廣德一援甯廣之
閒又須有一支重兵往來策應勢不能繞越皖
境而徑趨蘇常此蘇常急難規復之實情也

諭旨又念上海兵力單弱嘉興亦未收復一節前准薛
煥咨函松江上海等處水陸兵數無多欲由張
玉良處分撥三千人未知果調得勁旅否臣相
距過遠援應不及近因浙西多事文報阻滯雖
彼此各致數函均尙未接覆書據探僞忠王李
秀城帶領賊衆由金陵往犯上海頃聞松江復
陷上海舟師大挫危迫殊甚至張玉良嘉興一

軍與臣處信息罕通但聞二十九日地道挖成
轟塌數丈旋因賊眾堵禦未能成功又微聞將
帥不和文武不協相持過久恐生事變臣新膺
督師江南之

命本有統轄該軍之責惟現值皖南危迫勢不能舍近
而圖遠且廣德復陷浙事日棘臣與兩處文報
動多梗塞此嘉興上海暫難兼顧之實情也

諭旨垂詢江北一帶如何布置一節臣前於五月十七

日奏飭總兵吳全美李德麟師船全數下駛駐
泊焦山瓜州等處以通鎮揚兩府之氣而扼逆
匪北渡之路又於七月初三日奏派遣員李鴻
章興辦淮揚水師以護鹽場而輔陸軍無非爲
力保江北起見惟水師庀材鳩工赤地新立非
數月所能就緒臣俟皖南各城立腳稍穩乃能

繞道馳赴淮揚亦非數月所能成行側身東望
焦憤實深都興阿疊奉

諭旨督辦揚州軍務日夜憂灼謀所以速行之法官文
胡林翼亦百計經營謀所以資送之法無如事
多窒礙迄不能就不特三千勁旅五月口糧鄂
省之力一時難以撥付卽弁勇之心亦實不願
遠行蓋自湘省至揚州繞道五千餘里上游一

水可通人多而氣聚下游百物昂貴人少而勢
孤同一應募之勇同一額定之糧其願就鄂就
皖而不願赴揚州者情也勢也以臣愚見淮徐
等處風氣剛勁不患無可招之勇但患無訓練
之人擬卽函商官文都興阿等酌帶楚師千人
先行馳往仰慰

聖懷到江北後用楚軍之營制練淮徐之勇丁嚴其禁

約寬其期限李鴻章往辦水師亦照此法行之
臣明年馳赴淮揚亦照此法行之餉絀而不改
其常戰敗而不變其度期於有成而後止若仗
聖主洪福得一二名將出乎其間則兩淮之勁旅不減
三楚聲威此江北先行籌畫之微意也

同日瑞昌來存王有齡奏言據太湖協副將王
之敬等稟稱該處附近之光福香山胥口橫涇

等處民團並蘇城逃出難民均稱城內賊目惟一李秀城其輜重皆載運出關米糧無幾難民亦多放出惟閭門立有賊館其餘均未設備賊匪稱民團爲白頭似甚畏懼民團聞之意欲合隊攻城因無官兵接應而止聞常熟至無錫蕩口一路均無賊蹤而無錫城內之賊僅三四百人惠泉山雖有賊館亦不過十餘人該二縣民

團尤爲得力官兵一至必能影附風從請分遣
水陸各軍一由橫涇胥口直擣蘇州一由獨山
門直擣無錫等語又據代理吳縣知縣沈錫華
稟稱該員現駐橫涇鎮探聞六月中旬旬蘇州吳
江賊不滿千刻下人數漸多在胥盤兩門之外
騎馬往來觀看田稻其橫涇等處轉瞬秋成勢
必四出搶割人心惶惶如再不見大兵恐無尺

寸完善又專人赴崑山一帶探知二十三日有
數萬賊過崑山前赴松江上海聞二十六日松
江復陷上海尙在固守賊用巢湖長龍等船截
擊行船又擄去數十隻共有大小賊船五六百
隻一入太湖處處可通湖中僅有礮艇八隻斷
難堵禦惟望署總督統兵速來救民水火若遲
至八九月間則無及矣並盤獲奸匪供稱賊之

精悍半在嘉興意欲攻破上海再擾常昭該鎮
與上海文報不通請卽出示曉諭民團以資激
勸等語當卽給發告示飭王之敬等會同沈錫
華辦理查常熟地處海濱與太湖有東西之隔
已不能互相聯絡民團雖衆火器無多要非協
以官兵難期有濟卽日天涼稻實賊之搶割又
在意中大股突來如何能禦現在浙省湖屬尙

有賊蹤嘉興亦未克復西旣毗連宜溧東又偏
近松江數路分防殊形棘手卽使嘉城立拔尙
須先攻松郡未能直搗蘇州曾國藩近在祁門
又以部曲未齊一時尙難東下而三吳百姓日
夜盼望大兵臣等聽其沈淪而莫之援救心竊
痛之况上海爲餉源所在若再疏虞三軍從何
得食而江浙百數十萬清糧非但徵無可徵亦

竟運無可運倍深焦灼除飭副將黃金友等督帶礮船駛往平湖嘉善一帶相機防剿外已屬無兵可撥應如何

飭下曾國藩先其所急會攻蘇省之處恭候

諭旨施行均奏入

上命軍機大臣傳諭曾國藩曰蘇省賊氛延蔓急盼援兵而曾國藩部下兵將未齊驟難進剿亦屬實情著

俟李元度等陸續到徽後應如何攻勦廣德派援甯國卽照議迅速辦理至淮徐勇丁可用都興阿卽可無須多帶兵勇前往江北所籌尙屬妥善已諭令官文等酌撥楚師千人令都興阿速卽起程矣再本日據瑞昌等奏探聞賊目李秀城住居蘇城並不設備賊數不滿千人時於胥盤兩門之外觀看田稻無錫城內之賊亦不過三四百人均甚畏民團等語蘇城

之賊圍攻上海其空虛亦在意中著曾國藩確行偵
探如該處及無錫兩城果係賊匪無多卽著檄調勁
旅閒道出奇前往規復亦不可失此機會不必專俟
兵勇到齊轉涉拘泥也

上又命軍機大臣傳諭官文都興阿胡林翼曰本日據
曾國藩奏稱淮徐民風剛勁不患無可招之勇而患
無訓練之人已函商都興阿祇須酌帶楚師千人前

來江北到防以後以楚師之營制練淮徐之勇丁可
期得力等語所籌係因楚軍無可調撥爲因才於地
之計尙屬妥善著官文胡林翼卽行調派馬步得力
兵勇千名配齊軍裝糧械令其速赴都興阿軍營爲
數旣屬無多不得再行推諉都興阿於此項官兵到
後著卽統帶起程前往江北到防以後應如何於淮
徐等屬抽調勇丁加以訓練藉資防剿之處卽著與

曾國藩會商辦理

瑞昌來存王有齡又奏言餘杭逆匪敗退後卽
在三十里外紮任總兵劉季三派參將劉志仁
等隊三千餘人於六月二十二日親統進剿饒
廷選復派隊三千餘人隨同前進署藩司麟趾
督帶親兵五百名臣等又派協領恆全帶旗兵
五百名同知甘應槐帶小隊五百名在後策應

並抽派千人赴餘富一帶山路設伏劉季三行抵三墩地方賊營開礮相拒我軍兩路並進把總雷成龍於槍礮叢中冒死登牆各勇相繼躍上賊卽棄巢奪路而遁沿途追殺斃賊尤多追至餘杭城上賊檝如林意在拒守當派劉志仁等奮勇力攻矢石交下未能得手我軍卽在距城三里紮營探聞西城守備稍懈二十三日該

鎮督隊進攻東南二門密令後隊繞至西路安
設竹梯蟻附而登守備李忠砍倒守垛數賊賊
始驚覺東南各門之賊紛紛往救我軍轟塌東
城一角卽乘勢攻入兩隊合於一處殺斃賊匪
不計其數賊出南門而逃立將餘杭縣城克復
其分股竄往富陽之賊遇我伏兵齊起甘應槐
亦帶隊接應該逆兩面受敵自相踐踏死者無

算餘匪竄回臨安二十三日甘應槐督率各隊
折回正當餘杭攻城喫緊之際併力相助遂一
擁入城麟趾等先行凱撤回省是晚大兵卽在
該縣暫駐訪問居民均稱當賊撲縣城時知縣
蔣鳳祥與賊接戰身受重傷城陷後該縣赴鄉
收集潰勇希圖進剿二十四日帶傷來見劉季
三飭令妥辦善後旋據探報首逆四眼狗尙踞

臨安青山頭一帶亦有賊營駐紮惟聞該逆患病甚重逆黨亦多病疫當無固守之志二十五日挑派六成隊伍令劉兆選等統帶前進劉志仁爲後路策應行未數里有賊五六千人分左右兩翼來撲勢甚兇猛我軍堅陣以待約半時許其氣漸衰我軍連環攻擊賊卽驚潰追至青山頭收隊次日西路援賊大至各軍皆懼劉志

仁指揮迎敵首斃執旗賊目一名賊勢稍卻我軍追殺數里與攻壘之兵夾擊之該處民團亦齊出助戰該逆首尾不能兼顧落澗死者以千計餘向山後遁去卡內之賊見援賊敗退亦卽遁回臨安我軍卽因賊壘據守青山一面進攻臨安賊堅壁不出二十八九等日探聞該逆竄至瓦罐村黃畷溪又有分竄餘杭之雙溪瓶窰

者卽派隊追勦賊已折由獨松關幽溪兩路而去僅獲餘匪數名據供四眼狗已於二十八日夜半扶病潛出北門官軍分隊攻城賊匪開礮抵拒無隙可乘三十日復分兵進攻南北兩門難民數百人開東門以納官軍我軍亦從南城躍上城中之賊大亂被殺千餘人餘匪逃出北門經官軍截擊轟斃者不少餘均梟水過河遂

於是日巳刻克復臨安縣城此外於潛昌化等縣均被賊擾昌化經副將劉芳貴迎勦獲勝復得徽師助防苦竹嶺賊卽退去未曾深入六月
初十日賊匪竄入於潛縣境知縣包容會同教諭王玉文等帶團堵勦接仗一時之久賊勢愈衆王玉文力竭陣亡於潛並無城郭賊已從西門而入遂於十一日失守該縣與典史夏章壑

等分赴各鄉催集民團奮勇進剿賊匪分路出竄卽於十六日收復於潛其竄富陽篠嶺青樹嶺之賊經該縣蔣貴斌督率民團據嶺開槍賊不能上而退二十二日又分股攻撲各嶺四路並進該縣適在篠嶺併力迎拒仰攻之賊率多受傷卽行遁去至新城各紳董糾集民團不下五六萬之衆十三十六等日逆匪數千欲犯該

邑之浮雲嶺百丈嶺等處俱經團勇擊退其臨
邑之章村紮有賊營亦經團勇前後夾擊賊爲
披靡追至章村十九日團勇潛至章村四面攻
撲該逆猝不及防斬馘無數賊多翻山而逸其
後屢犯黃嶺觀音嶺復經團勇攻擊大獲勝仗
二十九日富新地面之賊均已退盡先是檄調
總兵吳再升自嘉郡回援省城當令統率所部

馳赴富陽會同道員彭斯舉堵剿現在賊匪竄
過獨松關武康安吉等縣又將喫緊已令吳再
升取道瓶窰追出長興而止一俟全境肅清卽
當分布嚴防務保浙西門戶此次劉季三首挫
兇鋒今又跟蹤追剿克復兩城洵屬勲勞懋著
可否懇

恩將署直隸通永鎮總兵劉季三以提督

記名簡放出自

逾格鴻慈其在城固守在事出力之各文武員弁可否
擇尤酌保之處恭候

聖裁署餘杭縣知縣蔣鳳祥平日官聲尙好且力戰受
傷署於潛縣包容自行催集民團收復縣城功
過尙足相抵應均請革職暫行留任以觀後效
於潛縣教諭王玉文歷年辦理團練實心實力

現又禦賊捐軀殊堪憫惻應請

飭部從優議卹以慰忠魂奏入

上諭內閣曰逆匪竄踞餘杭經總兵劉季三等督兵進
勦當將餘杭縣城攻克其盤踞臨安之賊劉季三督
隊進攻我軍奮力夾擊民團亦齊山助戰遂將臨安
縣城克復其竄撲富陽新城昌化賊匪均經民團擊
退於潛之賊亦經民團會勦旋即退出仍著瑞昌等

督飭在事員弁兵勇跟蹤追剿無留餘孽總兵劉季
三著以提督遇缺提奏其失守地方之署餘杭縣知
縣蔣鳳祥著卽革職署於潛縣知縣包容帶團收復
著革職暫行留任以觀後效於潛縣教諭王玉文禦
賊捐軀殊堪憫惻著交部從優議卹其餘打仗守城
出力之文武員弁及各縣團練紳董著瑞昌等查明
保奏候朕施恩

二十六日

戊午

薛煥奏言逆衆圍撲瀨城勢極兇

猛七月初四日賊在東門外縱火旋由西南面
蟻聚偃城蘇松太道吳煦等揮隊施放槍礮擊
中賊衆不少該逆冒死衝撲我軍火器齊發相
持良久斃匪頗多另股繞越田陸自東而西約
賊萬餘中有馬隊數百往來馳驟我軍在城屹
立不動俟賊將近門臣親督副將和順等連放

大礮排槍斃賊百餘名逆勢稍卻轉趨北門距
四明公所不遠經董事候選道楊坊率領甯波
義民迎頭截擊殺賊甚多該逆猛撲城垣江清
驥等在城上疊開槍礮斃賊無數適黃浦江中
火輪船連放大礮以炸彈斃賊多名該逆始不
能支向西奔竄臣派隊出西門追勦堦殺數里
生擒七十餘名斬殺二百餘名立將附近西門

一帶逆氛掃蕩初五日逆衆分十餘股復來北
犯阻我北面糧路仍分撲西南兩面城垣官軍
守禦竟日無懈可乘浦江輪船及守陴兵勇開
礮轟擊至晚賊始漸退是日該逆分股窺至黃
浦南岸之周浦日圖犯南匯等縣經民團奮力
截堵勢將不支適遇火輪船開放大礮斃匪一
百餘名賊衆始退夜間賊匪向西逃竄滬城解

圍城外貿易之處已成焦土四鄉蹂躪幾徧斷
非一時所能復元且逆蹤遁去未遠青浦嘉定
等處賊踞如故生擒之賊供稱逆首尙欲赴蘇
糾集悍匪再犯上海是守禦未可稍形鬆勁臣
乞援之牘四出現惟長龍船三十隻甫進吳淞
口此外均尙無信亟盼援師趕到方可分投進
剿惟有督率文武竭力保此偏隅爲恢復各城

地步至此次司道廳縣將弁董事堅守危城奮
力擊賊仰懇

皇上天恩將此次尤爲出力之員

特予逾格獎擢以昭激勸其餘在事出力員弁容
臣酌
量保奏

薛煥又奏言七月初一日松江踞逆全行出竄
上海經副將陳汝霖等帶領各路民團前往規

復時臣在圍城之中不能分兵赴松卽飭陳汝霖仍領民團防守茲上海解圍該逆是否不致回竄松江容臣查明另行具奏又據野雞墩民團報稱七月初九日進攻南翔鎮業將該處踞匪斬殺殆盡現擬進攻嘉定青浦查目前蘇省兵力太單深賴民團得力臣前已屢飭各該地方官趕緊集辦現蒙

皇上特簡大臣督辦團練必更實力舉行奏入

上諭內閣曰此次逆匪圍攻上海勢甚臨張經薛煥督同在城文武嬰城固守督隊擊賊連獲勝仗力解重圍辦理甚屬得手江蘇巡撫薛煥著賞給頭品頂戴其尤爲出力之鹽運使銜兼署江蘇布政使署蘇松太道吳煦著賞給二品頂戴署江蘇按察使候補道江清驥著交軍機處記名遇有江蘇道員缺出請旨

簡放候補同知嚴錫康著俟補缺後以知府升用同
知直隸州用上海縣知縣劉鄒膏著以知府用先換
頂戴參將唐國棟著以副將升用千總王子龍著以
守備補用並賞戴藍翎候選道楊坊著留於江蘇以
道員用並交軍機處記名遇有江蘇道員缺出請旨
簡放其餘在事出力員弁紳董著薛煥查明保奏候
朕施恩另片奏松江府城經參將陳汝霖會同民團

前往收復又野雞墩民團進攻南翔鎮業將該處踞
匪斬殺殆盡擬攻嘉定青浦等語各該民團奮力剿
賊克復府城並擬進攻各縣實屬義勇可嘉著薛煥
迅將出力之團練紳董查明奏請獎勵以昭激勸

同日張芾奏言賊偏甯郡日久六月三十日西
路之賊傾巢來撲城北營盤並以游騎入村繼
火遊擊曾得勝正在引軍迎剿周天受飭派將

士分東西南三門環城而山兩軍縱橫夾擊賊
卽返奔我軍乘勢直攻西北賊巢賊負固死拒
鏖戰逾時士氣益奮擒獲悍賊數人賊駭亂欲
遁適都司江長泰躍馬馳至遂由西北西南疊
破逆卡三十餘處隨破隨焚乃揮軍轉戰而南
節節掃蕩城南七壘俱下俘斬甚衆各軍奮追
至綠錦鋪寒亭而止惟東路踞匪壓城而營周

天受督隊急攻毀夏家渡三卡都司黃其昌在
土山東溪橋一帶往來衝突負傷轉戰賊踞長
牆拒守而浙西賊衆大股回竄孝豐突犯廣德
距州城五里外連結二十餘壘勢頗臨張江長
貴杏米興朝撤軍回援並截回遊擊黃占超所
部以資分布一面督飭軍士附城築營堅壁以
待七月初四日該逆悉衆直犯我營江長貴親

督馬步各隊出城馳勦所向披靡詎建平一路賊黨繞竄城西北隅甫經擊退之賊仍糾衆回撲將城外各營圍裹數重且焚民居以阻我策應之兵黃占超身受重創遊擊江國林血戰一晝夜鉛藥俱盡先後力竭陷陣賊卽併股悉力攻城江長貴引軍出戰手刃數賊而左右傷折已多馬亦中槍而蹶回顧火光燭天羣賊已攀

城而上遂徒步突圍退至安吉旋聞米興朝亦已退至四安有欲赴杭州之說臣查廣德營中自派江長泰援甯後所存防軍六千餘人飢疲過半所禦悍賊六七萬衆寡本形不敵浙江調派之軍向安吉四安兩路前進終以變生倉猝援救不及致此挫失現在黃占超江國林尙未
有下落王全鼎殷榮基等均在甯國縣地方已

賊千餘抄襲我軍之後都司黃才貴帶勇撲入賊叢立斬黃衣賊目一名城上之賊開放槍礮黃英彪身受重傷昏暮收隊次日仍派六成隊伍進攻常州大股援賊至潘家莊一帶排列馮子材親督遊擊關松志等迎勦復飭副將梁克勳督隊接應陶茂森在新豐橋扼守維時該逆分股來迎我軍勇氣百倍直搗賊叢黃才貴怒

馬陷陣手刃黃衣賊目二名、馮子材另派一軍抄賊後路復督率親軍從旁截勦將賊隊分爲

兩段逆勢不支奪路敗逃我軍乘勝跟追沿途勦殺及落水溺斃者不計其數追至丹陽北門該逆鼠伏不出十五日分路力攻西北兩門馮子材督飭關松志等豎梯爬城均爲該逆槍礮所阻勢難攻入滕嗣林首先爬城被賊擗石擊

傷右骸當卽撤隊回營丹陽旣難得手而援救
金壇未可稍緩因添派副將向奎抽調勁旅一
千四百名前往協勦正催令拔隊間卽有金壇
潰出之遊擊朱正華等到鎮據稟本月十六日
賊撲壇城叛勇內應金壇失陷等情茲復探稱
金陵句容之逆糾黨欲犯鎮江鎮防精銳均已
調赴丹陽若被截斷歸路非獨不能恢復丹陽

卽鎮防亦在可慮渺茲一郡實爲東南要隘若
稍有挫動則瓜揚更屬可虞惟有先其所急保
顧南北全局爲要現商明馮子材緩圖丹陽酌
撥隊伍回鎮協防並將大隊移紮越河以扼要
衝而資兼顧所有進攻丹陽打仗陣亡之儘先
外委蔣文舉一員請

旨飭部照例議卹其金壇縣城失陷情形容俟詳細查

明再行具奏奏入

上諭內閣曰金壇一城固守數月之久乃於援兵未到之先竟致失守殊堪憤懣著巴棟阿迅卽查明失守情形並文武下落具奏其在丹陽陣亡之儘先外委蔣文舉著交部照例議卹

巴棟阿又奏言鎮江府城自金陵大營潰裂後臣與馮子材會籌防剿雖未貽誤事機然究無

督辦大員一切布置機宜未免無所專責查總
兵鄭魁士謀勇兼優老成練達且曾在鎮江剿
賊於地方營務一切均皆熟諳該員經袁甲三
奏調皖北助剿現因傷病未痊尙未起程近駐
江北仙女鎮地方仰懇

天恩俯念鎮城關繫緊要可否將鄭魁士改調來鎮商
辦機宜於軍務實有裨益奏入

上諭內閣曰前因袁甲三奏請令鄭魁士來營當經降旨准其前往茲據巴棟阿奏稱該鎮曾在鎮江勦賊於地方營務均皆熟諳請改調鎮江辦理軍務等語新授甘肅甯夏鎮總兵鄭魁士著准其調赴鎮江軍營以資熟手

二十九日

辛酉

李若珠奏言七月二十日准薛煥

函稱滬城已經解圍守城兵勇不過千餘人現

在逆蹤尙在數十里內各處援師未到若不乘
此聲勢水陸夾擊連復數城斷難保此餉源重
地囑臣將鎮江協防之副將向奎原部二千人
趕緊派往以資防勦等語臣思向奎一軍本歸
巴棟阿調遣惟上海旣已解圍亟應乘勢進攻
不敢稍存漠視卽經函請巴棟阿飭令迅速馳
往並恐鎮城兵力單薄又將派援金壇之二千

人留於鎮江仍歸巴棟阿調遣以補向奎一軍之缺俾免疏虞至金壇縣城據遊擊朱正華等稟稱金壇被圍四月之久該逆屢撲屢敗傷斃無數先是從九品馬雲臺與守備馬得勝私通賊營約期內鬩經總兵蕭知音查出卽將叛逆馬雲臺訊明正法馬得勝先期投賊至七月十六日賊攻各門馬得勝前帶之勇暗爲內應繫

賊上城放火喊殺蕭知音李淮馳往抵禦裏入
重圍參將周天孚艾得勝被賊戳傷倒地朱正
華等身帶重傷勢不能支卽帶所部壯勇突出
重圍先後馳抵鎮城等語 臣查遊擊朱正華等
防守金壇已逾數月今又帶傷突圍自應令其
仍紮鎮江隨同防勦惟潛謀內鬩之守備馬得
勝及所帶之川奮勇作賊內應實屬罪不容誅

現聞金壇兵勇逃至鎮城者已有二千餘人該處正在收集潰勇難保無金壇勇丁混雜其中潛至鎮城應募應請

旨飭令巴棟阿務須就近稽查如有川奮勇逃至鎮城者卽責令各營將弁隨時查出就地正法以杜奸宄而昭慎重奏入

上命軍機大臣傳諭巴棟阿曰逆衆圍撲上海經在城

文武奮力擊退守城兵勇不過千餘人現在逆蹤尙在數十里內各處援師未到自應令向奎一軍迅速前往乘勝進攻力保餉源重地前據巴棟阿奏金壇縣城於七月十六日失陷當經諭令查明失守情形並文武下落具奏茲據李若珠奏金壇固守已逾數月守備馬得勝與賊潛通川奮勇約期內應遂致縣城失陷兵勇逃至鎮城者已有二千餘人現當招集

潰散兵勇之時難保無此項川勇濶雜其中潛至鎮城應募著巴棟阿嚴密稽查如有川奮勇逃至鎮城者責令各營將弁隨時查出卽行正法毋使奸宄濶跡致貽後患

同日袁甲三奏言天長一城係粵逆龔長春占踞與六合勾結一氣臣前派總兵黃開榜管帶礮船嚴防高寶湖面自菱塘橋擊賊獲勝後該

逆不敢外竄黃開榜防堵甚嚴惟所部全係水師並無步卒難以直搗巢穴定遠正在得手又屬無兵可分惟有俟克復定城後再行相機籌辦其江北一帶團練前經臣奏派道員徐曉峯前往督辦疊據稟稱高寶等處均已辦有端倪並與黃開榜水師聲勢聯絡裏下河門戶可期漸固奏入報